

Maani nunami ilinniartitsisunngorniartarnerup qaffasissusaa nunani killerni ilinniartitsisunngorniartarnerup qaffasissusaanut assersuunneqarsinnaanersoq paasiniarlugu Naalakkersuisut misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermut ilanngunneqassapput ullumikkumut naleqqiullugu ilinniartitsisunngortarnerup qanoq pitsaanerulersinnaaneranut innersuussutit.

(Inatsisartunut ilaasortaq Andreas Uldum, Demokraatit)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerinnineq

Maani nunami ilinniartitsisunngorniartarnerup qaffasissusaa nunani killerni ilinniartitsisunngorniartarnerup qaffasissusaanut assersuunneqarsinnaanersoq paasiniarlugu Naalakkersuisut misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuummik siunnersuuteqartup saqqummiussineranik Naalakkersuisut sinnerlugit qutsavigaara. Siunnersuuteqartoq qinnuiviginnippoq ullumikkumut naleqqiullugu ilinniartitsisunngortarnerup qanoq pitsaanerulersinnaaneranut innersuussutit misissuinermut ilanngunneqassasut.

Naalakkersuisut aallaqqaasiullugu ilisimatitsissutigisinnaavaat ingerlatat assigiinngitsut ilinniartitsisunngorniartarnermik nalilersuinernek imallit aallartinneqareersut. Assersuutigalugu taaneqarsinnaavoq EU Kommissiuni Ilinniartitaaneq pillugu Peqatigiinnermik Isumaqatigiissutip suliarineqarneranut atatillugu Kalaallit Nunaanni ingerlaqqilluni ilinniartitaanerit nalilersornikuugai, tassunga ilanngullugu ilinniartitsisunngorniartarneq.

Nalilersuinermi siunertaq tassaavoq amerlassutsinik paasissutissat pissarsiarineqarsinnaasut atorlugit ilinniartitaanerit tamaasa nassuiarnissaat, tassunga ilanngullugit ilinniartut, ilinniartitsisut amerlassusaannut, missingersuutinut paasissutissallu amerlassutsinik imaqartunut allanut tunngasut. Tassunga tulliullugu siunertaavoq Danmarkimi ilaatigullu Savalimmiuni ilinniartitaanernut sanilliunneqarsinnaasunut tunngatillugu ingerlaqqilluni ilinniartitaanerit pitsaassusiisa nalilersornissaat.

Tassunga atatillugu inerniliisoqarpoq nunatsinni ingerlaqqilluni ilinniarnerni ilinniartut amerliartortut, kisiannili ingerlaqqilluni ilinniartitsinerni sulisussanik pisariaqartitsinermut qaffariaat taanna naapertuutinnitsoq. Ukiumut ikinnerpaamik 100-nik amerlanerusunik ingerlaqqilluni ilinniarnermik naammassinnittartut pisariaqartinneqarput.

Aammattaaq takutinneqarpoq immikkoortuni tamani ilinniarnermik aqqissuussinerit Danmarkimi iliniartitsinernik aqqiissuussinernut assigisaannut assingusorujussuit.

Tassunga peqatigitillugu ilassutigineqassaaq Ilisimatusarfimmi rektori 2013-imi septemberip naanerani ingerlaqqilluni ilinniartitsinerit pillugit Naalakkersuisut isumasioqatigiissitsineranni paassutissiisoq siulersuisut aqutsisut peqatigalugit ilaatigut ilinniartitsisunngorniarmimi ilinniagassat pitsannortinnissaasa oqallisigineqarnissaat aallartikkaat. Ilinniagassat pitsannorsarnerat ilaatigut pisinnaavoq ingerlaqqilluni ilinniartut ilinniartitsisunngorniarnermi piginnaalikkatik ilinniartitsinermi allani atuisinnaalernerisigut.

Tamassuma saniatigut Naalakkersuisut KANUKOKA IMAK-ilu peqatigalugit meeqqat atuarfianni atuartitsineq nalilersorniartaat, Naalakkersuisullu 2013-imi novembarimi ingerlatsisunit suliamut attuumassuteqartunit peqataaffigineqartumik meeqqat atuarfiat pillugu isumasioqatigiissitsiniarput.

Ingerlanneqartut qulaani taaneqartut tamarmik Naalakkersuisut Ilinniartitsinermut Pilersaarutaanni II-mi Inatsisartunut 2014-imi saqqummiunneqartussami ilanngunneqassapput. Suliami tassani ilanngunneqassapput ilinniartitsisunngorniartarnerup pitsannortinnissaanut tunngatillugu inassuteqaataasinnaasut. Naalakkersuisut pingaartippaat IMAK-imik suleqateqarneq, siunissamilu meeqqat atuarfiata iluani allannguutaajumaartussat IMAK-ip oqaloqatigereerneratigut pisarumaarput.

Taamaammat siunnersuut taamatut isikkoqartillugu Naalakkersuisut ilalersinnaangilaat.